

Q. D. B. V.

DE

EPIMENIDE  
PROPHETA,

AD

CAP. I. V. 12. EPIST. AD TITVM

NUMINE DIVINO ASSISTENTE

NEC NON

VENERANDA FACVLTA TE PHILOSOPHICA  
PERMITTENTE

PVBLICE

IN CELEBRI ACADEMIA ALTORFINA

AN. MDCCXIV. D. EID. MARTII

DISPVTARIT

P R A E S E S

M. IOH. CASPAR GOTTSCHALCK,  
VRATISLAVIENSIS,

RESPONDENTE

STEPHANO LOTZIO,  
ALTORFENSI

---


LITERIS IOD, GVIL. KOHLESII, ACAD. TYPOGR.



58700 (10)







## PRAEFAMEN.

**Q**uinquennium jam est, & quod excurrit, ex quo hic partim, partim alibi in Alma Philurea, ad pedes Gamalielum nostri temporis consedimus. Quemadmodum vero ab illo tempore partim ex modestiae studio, partim ex imbecillitatis conscientia, ad Pythagoraeorum discipulorum exemplum, alios publice privatimque docentes audire, quam intempestive loqui, maluimus: ita jam e re nostra fore duximus, tandem prodire, & aliquales ingenii vires publice periclitari, tanto excusatius facturi, quanto minus decorum est, perpetuo latere, nec unquam aliis studiorum suorum rationem reddere, audere. Non inutile tamen prorsus, nec a studiorum proposito alienum argumentum pertractandum nobis sumsisse videbimur, cum de PROPHETA aliquo Pagano, ad cujus testimonium divus Paulus in sua ad Titum Epistola, cap. 1, v. 12, provocavit, nonnihil commentari, constituimus, ut inde etiam quodammodo constet, quemadmodum utilitas ex Paganorum scriptis sit capienda; quod argumentum jam dudum divus Antistes, Basilius, luculenta oratione explicavit.



DE  
EPIMENIDE PROPHE TA.

§. I.



Vamvis non nesciamus, dubitatum a nonnullis esse, quem veterum Græcorum Poetam divus Apostolus loco citato intellexerit : attamen, cum vulgaris sententia, non obscuris argumentis innixa, ad EPIMENIDEM, Poetam Cretensem, respici tradat, nos sine multis ambagibus de hoc ipso Poeta ita agere constituimus, ut primum de ejus vita & eruditione quædam proponamus, & deinde, quo sensu idem PROPHE TA dictus sit, inquiramus.

§. II.

In patria EPIMENIDIS investiganda non adeo multum desudabimus, præsertim cum non de hac, ut olim de Homeri patria, inte-



integræ septem urbes dimicaverint : Ipse enim partim Apostolus eandem nobis indicat, dum eum proprium Cretensium PROPHETAM nominat, unde non solum EPIMENIDEM apud Cretenses PROPHETAM, sed etiam patria Cretensem fuisse, colligas. Partim vero unanimi ferme scriptorum consensu, Cretam EPIMENIDIS PROPHETAE patriam fuisse, corroboratur. Eum in finem, referente Alexandro Moro, in Notis ad quædam loca Novi Fœderis, a Proclo in Dissertationibus ineditis Ἐπιμενίδης ὁ Κρητῆς, i. e. EPIMENIDES CRETENSIS, passimque alibi hoc quasi cognomento a patria petito salutatur.

### §. III.

Moris enim fuit plerumque, inprimis Philosophis, patriæ nomen nomini proprio adjungere, aut illo quoque solo homines denominare. Ita præcipue in vitis Philosophorum, Philosophos pene omnes, una cum adjecta ipsorum patria, e g. Aristotelem *Stagiritem*, Antisthenem *Atheniensem*, Pythagoram *Samium*, & sic quoque nostrum EPIME-



NIDEM a patria CRETENSEM vocatum invenies.

§. IV.

Sic igitur Creta patria fuit nostri EPIMENIDIS, insula in mari mediterraneo sita, olim Ἐκατόμπολις dicta, de qua Virgilius *L. 3. Aeneid.* v. 104:

*Creta Jovis magni medio jacet insula Ponto,  
Centum urbes habitant magnas &c.*

Hodie vero Candia audit, & a montibus ejus occiduis, qui λευκὰ ὄρη, id est, candidi, dicuntur, nomen, teste Strabone, sortita dicitur. Et Plutarchus libello πῶς ἂν τις ὑπὸ' ἐχθρῶν ὠφελοῖτο in limine nullam ait Rempublicam sine affectibus reperiri, cum inveniat quædam regio sine belluis, ὥστερ ἰσορᾷσι τὴν κρητὴν, quam dicit χῶρον ἁθρόον: unde lepos forte EPIMENIDIS, Cretenses κατὰ θηρία vocantis, originem traxit, gloriantes, apud se nullas feras esse belluas, cum ipsi pessimæ fuerint belluæ.

§. V.

Genitores autem EPIMENIDIS quod concernit, nihil de his Viri eruditi certi definire possunt;



possunt ; quare & nos eosdem hic certo nominare non valemus. Vt ait Theopompus, aliique complures, teste Laertio, patrem ille habuit Phæstium, alii Dosiadem, alii Agefarum, tradunt.

### §. VI.

Istis nunc breviter quasi præmissis, jam ad eruditionem hujus nostri PROPHETAE EPIMENIDIS devenimus, quæ certe, nullo non consentiente, magna fuit atque egregia, ideo enim passim verbis a viris eruditis magnificis celebratur, ejusque sapientia in cœlum usque effertur.

### §. VII.

Cum vero homines certæ ut plurimum scientiæ inprimis addicti, ideoque vel a studio Theologico, Theologi; a juris peritia, Jurisperiti; a scientia medica, Medici; nec minus a studio philosophico Philosophi audiant: inquirendum idcirco nobis in eruditionem EPIMENIDIS ulterius est, cui inprimis studio addictus, an Philosophus, Poeta, an PROPHETA, vel quo sensu ab Apostolo Paulo ita nominatus fuerit?

### §. VIII.



## §. VIII.

Nos itaque, ut confido, non errabimus, si in hoc nostro EPIMENIDE PROPHETA & Philosophiæ & Poeseos studium utramque fecisse paginam, eundemque & insignem partim Philosophum, & Poetam simul haud incelebrem fuisse, dixerimus.

## §. IX.

Ad sapientiæ studium quod attinet, nemo sane Viro huic illud denegabit. Adeo enim, ut ex Plutarchi vita Solonis, nec non Diogene Laertio in vita Thaletis constat, de ejus sapientia honorifice Veteres senserunt, ut in numero septem Græciæ Sapientum quidam rejecto Periandro, EPIMENIDEM recensuerint. Imo quemadmodum communi alias in orbe dictorio, homines si non ex se, tamen ex aliis & ex consuetudine cum aliis cognoscere licet; ita pari modo hunc nostrum EPIMENIDEM, Philosophum summum, ex familiaritate summa cum Solone habita deprehendes. Vtpote qui Athenas veniens, teste Laertio, Solone usus est familiariter, ipsique etiam ad leges scribendas viam præmuniit.

## §. X.



## §. X.

Ex hoc ipso simul cognoscitur quodammodo ætas EPIMENIDIS; cum Solon Olymp. XLVI, 3, hoc est, computante Vossio, Anno Mundi MMMCCCLVI, Athenis leges tulisse feratur. Et epistolam EPIMENIDIS recitat Laertius, quam ille scripsit, cum Pisistratus Athenis dominaretur. Jam vero Pisistratus Athenis tyrannidem invasit, Olymp. LIII, 2. Aliorum autem disensum de ætate EPIMENIDIS, utpote propter vetustatem non satis certa, observavit cl. Dodwellus, ostenditque, aut antiquos Auctores errasse, aut diversos EPIMENIDES extitisse, *in diss. de Aetate Pythag. p. 234.* Conf. & celeb. Fabric. *Bibl. Græc. L. II, c. 13.*

## §. XI.

Cum vero insignem Philosophum fuisse EPIMENIDEM dixerimus; id quidem nomen apud Veteres cum primis tam late patet, ut omnem rerum divinarum humanarumque scientiam complectatur. Jam quod ad EPIMENIDEM attinet, cum ille, teste Platone, *L. III. de Legibus*, dicatur omnes ante se Sapientes



pientes ingenio & industria longe superasse facile quidem credi possit, ei nullam non Philosophiæ partem fuisse cognitam: interim constat, ipsum ad exemplum cæterorum Virorum sapientum, qui ea ætate floruerunt, potiorer rationem Philosophiæ *Practica*, quam *Theoretica*, habuisse, adeoque majori cura in iis quæ ad vitam civilem feliciter agendam pertinent, quam in iis, quæ contemplatione continentur, versatum fuisse. Huc pertinet, quod a Laertio dicatur Soloni ad scribendas leges viam præmuniisse, & quod Plutarchus in vita Solonis commemoret, eum, cum Athenæ evocatus esset, cives justitiæ parentes magisque sequaces reddidisse ad unitatem. Vt alia nunc testimonia prætereamus.

## §. XII.

Si vero nec ignotum est, Philosophos olim etiam tradidisse rerum divinarum scientiam & hos apud multas gentes rem sacram administrasse: mirum esse non potest, harum rerum laudes etiam EPIMENIDI passim tribui. Hinc Diodorus Siculus *L. V.* eum vocat θεολόγος. Et Plutarcho *in vita Solon.* dicitur θεοφιλής ἢ σοφός.



ὁ δὲ περὶ τὰ θεία, πλεὺς ἐκθυσιαστικῶ καὶ τελεστικῶ σοφίαν,  
 e. *Vir religiosus & in rebus sacris sapientia  
 excellens fanatica & mystica.* Atque, uti Laer-  
 tius refert, eum scripsisse Theogoniam aliquam,  
 & librum de Sacrificiis, primumque domos  
 & agros expiasse; ita & Suidas auctor est,  
 eundem evulgasse μυστήρια καὶ καθαρμούς, *Mysteria  
 & Lustrationes*; speciatim vero Athenienses,  
 cum peste laborarent, expiasse, passim com-  
 memoratur. Ad hoc non solum apud hos fa-  
 tum verendorum Deorum condidit, iisdem-  
 que aræ ignoto Deo extruendæ auctor fuisse  
 creditur: sed Epiphanius etiam tradidit, ipsum  
 fuisse omnino *Sacerdotem*, ἀρχαῖον οἶτα φιλόσοφον καὶ  
 ἱερέα, & ὡς αὐτὸν κρηστὸν εἰδωλῶν ἱερέα. Vnde sat facile lo-  
 cum invenit conjectura Borremansii, qui, cum  
 ex Porphyrio narravit, in Creta olim fuisse Jo-  
 nis Sacerdotes, qui animalibus abstinerint,  
 inter hos etiam EPIMENIDEM fuisse censuit.

### §. XIII.

Poetam fuisse EPIMENIDEM nemo ne-  
 gaverit. Referente enim Laertio *in vita ejus*,  
 eum a Labone Argivo, & a Demetrio Magne-



fio, in libros Poetarum relatus est: qui vere libri temporis vetustate perierunt. Etenim scripserat EPIMENIDES Caretum & Corybantum generationem, & Theogoniam ad quinque millia versuum. Argus quoque navis apparatus & structuram, & Jasonis in Colchorum navigationem ad sex millia & quingentos versus. Hieronymus tradit, EPIMENIDEM etiam librum *πεὶ ξηνομῶν*, de Oraculis, scripsisse, cujus libri quamvis nec apud Laertium, nec apud Suidam fiat mentio, potest esse, ut ille aliunde eum noverit. Ita enim plures Veterum Sapientes *ξηνομῶν*, seu Oracula carminibus consignata, prodiisse perhibentur, uti apud celeberrimum Fabricium in *Bibl. Græca* L. 1. de Eucloo, Lyco, Oleone, Musæo, Orpheo, videre licet Heroicos autem potissimum versus fuisse, quos fuderit EPIMENIDES, ex Pausania intelligimus, L. 1. p. 35. Cujus generis est etiam versus ille notissimus, quem divus Paulus citavit

*Κῆντες αἱ ψεύσαι, κακὰ θνητῶν, γαστέρες ἀργαί.*

*Cres semper mendax, mala bestia, venter obesus*  
Vel sic:

*Mendax, venter iners, semper mala bestia*  
*Cres est.*

§. XIV



## §. XIV.

Licet vero quidam fuerint, qui ipsum hunc ab Apostolo Paulo citatum versiculum, non EPIMENIDI PROPHETAE, sed Callimacho potius, vindicare voluerint: optime tamen ad hoc, inter alios, eruditissimus *Dilherrus*, in suis ad Eclogas N. T. Syriacas, Græcas & Latinas, observationibus, respondisse nobis videtur: *Falluntur*, inquit p. 458., *qui hunc versum dicunt Callimachi esse, qui non Cretensis, sed Cyrenensis fuit: Nec integer* (ut bene addit) *apud eundem habetur, sed prius duntaxat hemistichion, in hymno de Jove, ubi Cretenses ridet, qui apud se Jovem esse sepultum jactabant, qui tamen, ut ait, non moritur, sed semper vivit. Est autem EPIMENIDIS CRETENSIS, Callimacho vetustioris, & legebatur in libro τοῦ ξηνοφῶντος, i. e. de Oraculis, unde a Paulo ironice vocatur PROPHETA.*

## §. XV.

De divinandi peritia, quæ insuper passim tribuitur EPIMENIDI, postea differendi dabitur occasio. Hoc loco autem si quæramus, unde



ad tantas scientias pervenerit EPIMENIDES, duas potissimum rationes a priscis Scriptoribus indicari animadverto. Primum enim nonnulli, docente Plutarcho in vita Solonis, tradiderunt, eum Baltæ Nymphæ alumnum fuisse. Sed ita fabulosa ætas omnia excellentiora referebat ad augustiores Deorum origines & conversationem. Deinde mirabilem ejus somnum, in quo talis sapientia ei obtigisse potuit, varii Scriptores referunt. Plinius, *L. VII. c. 52*: *Magna, inquit, fabulositate accipio de Gnossio EPIMENIDE, puerum æstu & itinere fessum, in specu septem & quinquaginta dormuisse annis: rerum faciem mutationemque mirantem, velut postero experrectum die. Paulo copiosius rem istam memoravit Diogenes Laertius: Missus aliquando a Patre, ut ovem rure deferret, meridiano tempore divertit ex itinere, atque in spelunca quinquaginta septem annos perpetuos obdormivit: dehinc somno excitatus, quarebat ovem; putabat enim parum se obdormivisse. Quem cum non invenisset, in agrum revertitur. Cum vero rerum omnium faciem immu-*



*immutatam cerneret, agrumque in alterius jus  
cessisse, stupore attonitus & dubius rediit in op-  
pidum. Ibi cum domum suam vellet ingredi,  
quisnam esset, interrogatus, vixque agnitus a  
juniore fratre jam vetulo, omnem ex illo di-  
dicit rei veritatem. Quam fabulosam de so-  
mno narrationem qui credunt a diuturna pere-  
grinatione originem traxisse, vix mihi falli vi-  
dentur. Id quod etiam sequentibus verbis in-  
nuit Laertius: Sunt, qui illum non obdormisse,  
sed ad tempus exspatiatum, asseverant. Equi-  
dem Jamblichius in Vita Pythagoræ refert EPI-  
MENIDEM inter eos, qui juvenes audivere  
Pythagoram jam senem: at cum Apulejus,  
in floridis, tradat, eum fuisse Pythagoræ ma-  
gistrum, vix aliquid certi definire licet.*

### §. XVI.

Antequam ad reliqua, de quibus potissi-  
mum suscepta est Disputatio, progrediar, mor-  
tis quoque EPIMENIDIS injicienda est men-  
tio. Ait Plinius, loco citato, eum in septi-  
mum & quinquagesimum atque centesimum  
vitæ annum durasse. Quem annorum nume-  
rum



rum etiam Laertius comprobat auctoritate Phasgonis, e libro de Longævis; sed simul memorat, Cretenses tradidisse, ducentesimo quadragesimo nono; Xenophanem vero Colophonium dixisse, centesimo quinquagesimo quarto anno. Pausanias Libro IV. scriptum reliquit, Lacedæmonios, dum bellum gesserint cum Gnosiiis, EPIMENIDEM vivum cepisse, ac deinde, cum eum occidissent, quod minime læta prædixerit, sublatum cadaver ante ædem Minervæ humasse. At & idem Auctor, *L. III.* annotavit, ab aliis talia, quæ narrantur, negari. Ex Hesychio autem illustri & Suida discimus, EPIMENIDIS mortui cutem *literis notatam* fuisse repertam, & ex oraculi jussu, tanquam rem miraculosam, a Lacedæmoniis religiose asservatam.

### §. XVII.

Sed nunc venimus ad ea, quorsum præcipue nostræ meditationes sunt directæ. Quæritur scilicet, an EPIMENIDES noster, Philosophus atque Poeta insignis, PROPHETA etiam, ita ut eundem in frontispicio harum  
nostra.



nostrarum plagularum diximus, revera fuerit, vel, qua ratione sancto nostro Apostolo Paulo non Poeta, aut Philosophus, sed disertissimis verbis ὁ προφήτης, seu PROPHETA audiat? *Propheta* vero proprie non est, nisi qui futura & hominibus incognita prædicit atque exponit ex Dei revelatione. Quod itaque ad hanc de PROPHETA EPIMENIDE quæstionem attinet, multorum Theologorum & Philologorum est opinio, PROPHETAM equidem EPIMENIDEM non fuisse, pro tali tamen a Cretensis habitum semper, firmiterque creditum. Dumque hic Gentium Doctor Paulus eundem PROPHETAE nomine compellat, fieri id putat eruditissimus Glassius per tropum Rhetoricum, per *Metonymiam* scilicet; cum opinio hominum pro ipsa sæpe re ponatur: sive cum ipsa rei denominatio & descriptio ab externo quandoque adjuncto opinionis hominum fiat, resque sæpenumero nominetur & describatur, uti est φανομένως, καὶ κατὰ δόξαν, non κατὰ τὸ εἶναι, καὶ ἀλήθειαν, *qualis nempe hominibus videatur esse, non, qualis sit in sua natura*: itaque EPIMENIDEM dici a Paulo *Prophetam*,  
C non,



non, quod revera talis fuerit, sed quod pro talia Cretensibus habitus atque creditus, eidemque etiam, teste Laertio, post mortem sacrificatum fuerit. Vid. Glassius in *Philolog. Sacr.* p. m. 1490. Cum qua interpretatione ferme consentit supra §. XIV. eruditissimi Dilherri inspersa sententia, existimantis, Paulum non vere, sed *εἰρωνικῶς* *Propheta* titulum EPIMENIDI imposuisse.

### §. XVIII.

Alii, cum Calvino, Cornelio a Lapide Nostratibusque non paucis, distinguunt velum inter Prophetas stricte seu proprie, & late sive improprie sumtos: Prophetam enim a *προφήτης* *prædico*, vel a *προφητεῖα*, *presagio*, *præannuncio*, *vaticinor*, dictum & stricte sumtum, illum ajunt cui Deus per varios modos, passim in Scriptura sacra, & apud Theologos obvios, peculiariter sese manifestavit, eundemque & de futuris certo contingentibus, iisdemque infallibiliter prædicendis, auxilio suo plane divino atque supernaturali instruxit. *Duo vero hæc*, ut eruditissimus Curcellæus loquitur, *ad Prophetam requiruntur: Primo singularis aliqua & eximia revelatio*



ratio divina: deinde mandatum, revelationem,  
 etiam aliis aperiendi, & cum aliis communicandi.  
 Vid. Curcell. tract. de Eccles. c. III, §. 2. Confer.  
 & Borremansius in elegantissimo de Poetis &  
 Prophetis Opere pag. 106.

### §. XIX.

Late vero vocabulum *Propheta* conside-  
 ratum hujusmodi denotare dicunt homines,  
 qui, equidem non peculiariter illo a Deo in-  
 structi fuerint dono, interim tamen ipsi per va-  
 ria divinationum superstitiosa genera, per ora-  
 cula, per consilium Pythonissarum, futurum  
 aliquid, sæpe incertum, aliquando verum, ple-  
 rumque amphibolice indagare, hominibusque  
 patefacere, laborarunt.

### §. XX.

Et inter hujus farinæ, five ultimæ sortis  
*Prophetas*, omnes Paganorum Sacerdotes,  
 Theologos & Poetas subinde etiam *Prophetas*  
 dictos, referunt, utpote qui, præter sapientiam  
 atque eruditionem profanam, divinum quo-  
 que aliquid affectarunt atque ambierunt, &  
 hominibus superstitiosis ac credulis volunta-



tem superum detegere, eosque futurorum certiores reddere, contenderunt.

§. XXI.

Quæ cum ita sint, locum sine dubio Vir prænominati eruditi, etiam huic nostro EPI MENIDI PROPHETAE inter Prophetas late seu improprie dictos, sive inter Gentilium *vates*, *divinatores* seu *hariolos* concedendum esse autumant, præsertim cum a Laertio divinationis peritissimus fuisse dicatur, & cum tot ejus prædictiones, quarum paulo post mentionem faciemus, a Scriptoribus antiquis ja-ctentur.

§. XXII.

Alii adhuc ulterius progressi non dubitarunt docere, Deum etiam extra cœtum diviniorem inter Paganos, aliquando Prophetas proprie sic dictos, veraque vaticinandi facultate præditos, excitasse; quibus & EPIMENIDEM haud ægre annumerarint. Suntque ex iis, qui hanc tuentur sententiam, Clemens Alexandrinus, Patresque multi, Baronius etiam, Vossius & Montacutius, qui ultimus in *Analectis*



*lectis suis, Exercitatione quarta, etiam gentes dicit habuisse suos Vates five Prophetas, licet rariores, qui res venturas, in suis causis non deprehensas, nec a Judæorum vatibus acceptas, sed simpliciter prævisas, & a Deo revelatas, enuntiaverint. Erant, pergit ille, illa quidem extra ordinem collata Prophetia dona, quemadmodum & vocatio nonnullorum & illuminatio specialis, quasi quadam prævia tum predictiones atque pignora, fore, ut gentes futuris temporibus aliquando biberent de illo fonte cælesti & aeterno, & de jugi illo puteo irrigarentur, unde affatim potabant & hauriebant aquas in hereditate constituta domus Jacob. Ita Balaamum, hostem Israelis perniciosissimum, Prophetam appellant Scriptura, qui quidem inter cætera prædicebat de stella Jacob oriunda, & sceptro ex Israel suscitando. Ita quoque e textu nostro tandem concludit, CRETENSEM EPIMENIDEM non Poetam a Paulo, nec Philosophum, cum posset; sed PROPHETAM, appellari.*

§. XXIII.

Aristoteles equidem hunc nostrum de iis

C 3

tantum,



tantum, quæ genii ope sciri poterant, i. e. de præteritis & obscuris, nihil autem de futuris certo eventuris, ad exemplum fere Socratis prædixisse, seu vaticinatum esse, adeoque ἐσοφῆτην magis, quam προφῆτην, qualem impius quondam Christi osor, Porphyrius, Daniele dixit, hunc quoque dicendum, asseruit. Ita enim *L. III. c. 17. Rhet.* Ὡς ἔφη, inquit, Ἐπιμενίδης ὁ Κρήσις ἐκεῖνος γὰρ περὶ τῶν ἐσομένων οὐκ ἑμαντεύσατο, ἀλλὰ περὶ τῶν γεγονότων, ἀδήλων δέ. i. e. *Vt dixit EPIMENIDES CRETENSIS: ille enim de futuris nunquam est vaticinatus, sed de præteritis, verum obscuris.* At huic Aristotelis sententiæ ceterorum Scriptorum testimonia, quæ mox laudabo, evidenter refragantur.

#### §. XXIV.

Etenim Diogenes Laertius testatur, eum divinationis, quæ olim summa Philosophiæ pars habebatur, fuisse peritissimum, siquidem cum apud Athenienses μαντιαν, portum Atticæ, vidisset, dixerit, ignorare eos, quantarum cladum causa locus ille futurus esset; quod si scient, dentibus illum esse discerpturos. Cui vaticinio



cinio tunc eventus respondit, cum Xerxis exercitus per eum portum Atticam invasit, vastavitque. Fertur idem, Lacedæmoniis prædixisse captivitatem, quam passuri erant ab Arcadibus; item & Cretensibus prænuntiasse belli exitum, quod inter Arcades & Lacedæmonios agebatur. Plato *L. I. de Republ.* vocat EPIMENIDEM ἀνέγξ θεῶν, divinum virum, eumque ait Atheniensibus prædixisse, decennio post venturos Persas, atque ubi venerint, infectis rebus, domum repetituros.

### §. XXV.

Atque sic etiam Erasmus Schmidius, in *Notis ad Cap. I. Epist. ad Titum* persuasus fuit, EPIMENIDEM revera & fuisse & dici ab Apostolo Paulo Prophetam, quia futurorum multorum præscius & index extiterit; profitetur vero Schmidius, se definire nolle, utrum hæc divinandi vis ei obtigerit ex sagacitate aliqua naturæ & facultate divinitus ei, licet Ethnico, concessa; vel ex Satanæ revelatione: qua de re se cum nemine litigaturum esse ait. Maximo-pere autem ad stabiliendam suam sententiam, has



has urget rationes : 1.) quia expresse hoc vocabulo *προφήτης* sanctus Paulus usus est : *Si enim talis*, inquit, *non fuisset, vel Poeta tantum exstitisset, sine dubio Apostolus facili negotio vocem ποιητής adhibere potuisset, quemadmodum Actorum XVII, v. 28. quando de Poetis Græcorum loquitur, usitato eos nomine ποιητὰς appellare non detrectavit : ὡς καὶ ἔγες, inquiens, καὶ ὑμεῖς ποιητῶν εἰρήνασθε.* 2.) quia in illo *πρόγνωσις* futurorum, tamque multa ; quæ supra jam dum recensuimus, veritati seu eventui non fuerint contraria. 3.) quia etiam ipso illo versu ex libr. *πρὸ τῶν χρησµῶν*, sive *de Oraculis*, inscripto, sub hoc ipsum tempus, quo Paulus jam hæc scribebat, mores Cretensium futuros *προφήτευσε*, quamvis de illo libro eruditi adhuc dubitent. 4.) quod argumentum forsitan possit addi, quo ipsi demonstrationi Paulinæ robur majus accedere videtur, convincentis scil. Titum atque declarantis Cretensium perversitatem. *ἰδοὺ*, inquit, *αὐτῶν προφήτης*, non *ποιητής*, utpote quibus una cum pictoribus, secundum notissimum illud, quodlibet sæpenumero & audendi & scribendi æqua semper potestas concessa fuit : sed *προφήτης* eorum, quem



quem tanti æstimant, tam sancte colunt, quique tam multa jam dum illis eventura prædixit, idem ille ipse cives suos, non suo modo, sed quovis subsequuturo tempore *ψεύτας, κακὰ  
θνεῖα, γαστέρας ἀργάς*, futuros, significavit.

## §. XXVI.

Qui vero factum, quod sæpenumero Prophetarum gentilium, quemadmodum etiam nostri EPIMENIDIS, dictis eventus seu veritas responderit, id sane multiplici ratione fieri potuisse, Viri docti arbitrantur. Modum hujusmodi, quo Prophetæ sive Vates atque Divinatores in prædicendis futuris usi fuerint, eleganter satis Joh. de Mey in *Physiologia Sacr.* p. 168. describit: *Recte, inquit, observatum ab aliis, nempe quod Vatibus Delphicis aliisque Gentilium Prophetis, late sic dictis, quaestui fuerint hominum animi superstitione capti: Habebant, pergit, per totam Græciam emissarios, qui res & fortunas cujusque perdiscerent, & sic mox consulti respondebant cuique convenientia. Inerant etiam dictis latebra, poteratque eventibus interpretatio accommodari. Et mihi dubium non est, varias excogitatas fuisse artes, quibus visi fuerint futura*  
D prædi-



*predicere imperscrutabilia, quorum tamen praedictio, ut est ab ipsis facta, facultates humanas non superavit.* M. Tullius cum disputat, cum jam pridem Pythii Apollinis cessaverint oracula causam adfert minime contemnendam; qui scilicet minus creduli esse homines coepissent quam antea, similiterq; de reliquis antiquorum Oraculis sentiunt Viri docti. Quid vero de Divinationibus Paganorum sentiendum, & quam variæ illorum fraudes fuerint, magno eruditionis apparatu docuit ex instituto Cl. Dalæus *in dissert. de Orig. Oracul.*

## §. XXVII.

Rursus sunt alii Scriptores, qui EPIMENIDEM non tam ob aliquam divinandi facultatem, quam ob munus sacerdotale, cum illum inter Cretenses præfuisse, supra ostendimus, ab Apostolo PROPHETAM dictum esse credunt. Jam vero idolorum ministros ac Sacerdotes etiam PROPHETAS appellari consuevisse, non solum non insolens est Scripturæ sacræ; uti v. g. Baalitici Sacerdotes 1. Reg. xviii v. 19, PROPHETAE dicuntur: sed illi etiam apud profanos Scriptores idem nomen sæpius ferunt



ferunt, uti v. g. apud Plutarchum Ammonis Sacerdotes προφήται appellantur: quam rem pluribus exemplis Borremansius, in *Libro de Poetis & Prophetis*, pag. 73. demonstravit.

### §. XXVIII.

Adhæc aliis PROPHETAE nomen idem hoc loco fuit, quod nomen Poetæ, perinde ut hi Latinis *Vates* sunt dicti, ac genus θεῶν καὶ ἐνδοστιάσιν ἐν habiti. Sic Adimantus apud Platonem *L. II. de Republ.* Poetas Deorum filios & PROPHETAS nominavit; & Lucianus, in *Dial. de Amoris*, Homerum τὸν μέγαν ἀληθείας προφήτην, *magnum veritatis PROPHETAM*, dixit. Etenim his etiam tribuebatur aliquis afflatus divinus, ut cum Ovidio ipsi gloriarentur:

*Est Deus in nobis, & sunt commercia cæli;*

*Sedibus æthereis spiritus ille venit.*

Poetam autem EPIMENIDEM fuisse, ex superioribus jam constat; atque fieri potuit, ut idem etiam, quæ Borremansii est conjectura, Oracula carmine reddiderit, quod olim fieri consuevisse, in primis ex Plutarchi libro, in quo de Pythiæ Oraculis differit, cognoscimus.



## §. XXIX.

Restat alia Cl. Angli, Hammondi, interpretatio, quam etiam sequutus est Dn. PHILIPPVS OLEARIVS, optimo Græcarum Latinarumque literarum auspicio Professor Publicus haud ita pridem Lipsiæ constitutus, *in dissert. de Scriptis Profanis, a Paulo Apostolo allegatis jam An. 1701. habita.* Ille vero in *Comment. suo ad N. T.* docet, eos apud Paganos etiam Prophetas fuisse dictos, qui homines docuerint, quæ vitæ recte agendæ rationes sint ineundæ, & quo pacto Dii irati placandi: id quod probavit quidem ex *1. Sam. VI, 1, 2.* sed malim, ut etiam ex Græco Scriptore testimonia hujus significationis attulisset. Ceterum EPIMENIDEM talem morum doctorem lustratoremque fuisse, ex supra dictis facile intelligitur, dum eum & Philosophiæ practicæ potio-  
rationem habuisse, & urbes varias lustrasse atque expiasse docuimus.

## §. XXX.

Hæ sunt præcipuæ, quæ nobis occurrunt, Scriptorum sententiæ, cur EPIMENIDES PROPHEETA fuerit a Paulo dictus. E quibus  
quam



quam quisque velit sequi, ei facile per nos lice-  
bit: ipsi tamen nondum satis persuaderi potui-  
mus, ut EPIMENIDEM vera divinandi facul-  
tate præditum fuisse crederemus. Quanquam  
enim nolimus negare, singularia esse Dei con-  
silia, & eum etiam inter homines veræ religio-  
nis expertes, suam majestatem sæpe variis mo-  
dis patefecisse; neque inficias eamus nobis  
omnium omnino mentium humanarum vim  
non satis esse cognitam, ut omnibus in uni-  
versum hujusmodi facultatem denegare quea-  
mus: interim cur talem extraordinariam va-  
ticipinandi virtutem EPIMENIDI vindicaremus,  
necessarias causas haud deprehendimus; cum  
& ejus vaticinia, siquidem vera fuerunt, quæ  
supra §. XV. ex aliis Scriptoribus attulimus,  
talìa videantur, quæ naturali sagacitati ac pru-  
dentia, qua ille maxime polluit, haud male ad-  
scribi queant; & cum ceteræ rationes, in primis  
si non tam separentur, quam conjungantur, fa-  
cile sufficiant, cur eum a Paulo PROPHE TAM  
appellatum fuisse credamus. Etenim & Poeta  
insignis fuit, & Sacerdos, & fatidicus passim  
habitus, & morum doctor egregius, expiatio-  
nibusque celebris, ut forte adhuc ea ætate, qua



scribebat Paulus inter Cretenses , κατ' ἐξοχὴν  
PROPHETA celebraretur.

### §. XXXI.

Plura addere nunc minus vacat , nec licet  
jam ad versum EPIMENIDIS , quem Paulus  
allegavit , explicandum , progredi ; quanquam  
in hoc interpretando D.N. OLEARIVS , hono-  
rifice a nobis appellandus , in erudita Differ-  
tatione paulo antea citata , ita versatus sit , ut  
vix aliis spicilegium reliquisse videatur. Cete-  
rum , a Benevolo Lectore veniam precati , si ex-  
pectationi ejus minus satisfacimus , DEVM  
supplices veneramur , ut nec hunc laborem  
prorsus irritum esse sinat.

## ΠΑΡΕΡΓΑ.

I. *Judæi æque ac Sociniani Divinitatem Jesu Christi ne-  
gantes , non verum Deum , sed idolum colunt , adeoque sunt  
idololatræ.*

II. *Si Judæi nomen Dei sanctum יהוה in nominibus pro-  
priis compositis legunt , sequitur hinc , quod ἑ extra compo-  
sitionem sit legibile.*

III. *Viri eruditissimi comparati cum fœminis eruditissimis  
majorem semper ἑ ubiq. illi præ his eruditionem possidebant.*

IV. *Certa aliqua lingua , quæ homini naturalis seu innata  
sit , non datur.*

V. *Contra miracula divina nec in excessu ea nimis au-  
gendo , nec in defectu ea minuendo , peccari debet.*

S. D. G.



DOMINO  
M. IOHANNI. GEORGIO  
GOTTSCHALCKIO

VERBI. DIVINI

APVD

VRATISLAVIENSES  
MINISTRO. VIGILANTISSIMO

NEC. NON

IBIDEM

AD. AEDem. S. MARIAE. MAGDALENAE

SENIORI. SPECTABILI

PATRI. OPTIMO

INDVLGENTISSIMOQVE

*HAS. PAGINAS*

SACRAS. ESSE. CVPIE



FIDEIQVE. SVAE. AC. PIETATIS  
OB  
INNVMERA. ET. PLVS. QVAM. PATERNA  
IN. SE. COLLOCATA. BENEFICIA  
MONVMENTVM  
CONSTITVIT  
TVM. ET. EIDEM  
A  
DEO. TER. OPTVMO. MAXVMO  
COMMODO. SEMPER. VALETVDINEM  
VITAM. LONGAEVAM  
FELICITATEM. PERENNEM  
EA  
QVA. DECET. MENTIS. RELIGIONE  
APPRECATVR  
*FILIVS. OBSEQVENTISSIMVS*  
M. IOHANNES. CASPAR. GOTTSCHALCK